



Sesida dals

13 da december 2022

Communitgà ils

15 da december 2022

Protocol nr.

961/2022

Dumonda Gansner

concernent l'alloschament privat da persunas da l'Ucraina che tschertgan protecziun

Resposta da la Regenza

La guerra en l'Ucraina ha provocà il pli grond moviment da fugia en l'Europa dapi la segunda Guerra mundiala. Ils 11 da mars 2022 ha il Cussegl federal decidì, che las persunas da l'Ucraina che tschertgan protecziun survegnian il status da protecziun S. Tras quai han las fugitivas ed ils fugitivs survegnì in dretg da dimora, senza ch'ellas ed els han stuì absolver ina procedura d'asil ordinaria. Il status da protecziun S è vegnì applitgà per l'emprima giada. Fin la fin d'avrigl 2022 ha la Confederaziun attribuì al chantun Grischun passa 800 persunas da l'Ucraina. Quai vul dir ch'i èn vegnidas attribuidas circa 30 persunas per di al chantun. Las structuras regularas eran concepidas per 30 persunas per mais. Gist durant questa fasa iniciala era il chantun dependent da mintga alloschament pussaivel. La Regenza engrazia a las famiglias ospitantas ch'èn s'engaschadas e che s'engaschan anc adina voluntarmain a favur da las persunas che tschertgan protecziun.

La fin d'october 2022 sustegnevan ils servetschs socials regiunals var 848 persunas en 481 dossiers, las qualas abitavan en alloschis individuals. Da quellas persunas vivevan 124 (91 dossiers) ensemen cun famiglias ospitantas indigenas en ina chasada cuminaivla. Sch'i resultan conflicts en la convivenza, po il chantun intermediar abitaziuns che vegnan purschidas da la populaziun. Particularmain en quels cas, nua che uffants èn gia scolarisads.

Tar la dumonda 1: La lescha grischuna prevesa che persunas che tschertgan protecziun e ch'èn economicamain dependentas, vegnan da princip colocadas en alloschis collectivs e sustegnidas finanzialmain da l'Uffizi da migraziun (art. 35 Ordinaziun tar la Lescha introductiva tar la legislaziun davart las persunas estras e davart ils fatgs d'asil; OtLitLEA; DG 618.110). Pervia dal grond dumber da persunas che tschertgan protecziun e ch'èn vegnidas attribuidas al chantun Grischun resp. che sa chattavan gia en il Grischun, ha la Regenza decidì, che las persunas cun il status da protecziun

S pon er vegnir collocadas en alloschis individuals. La Lescha introductiva tar la legislaziun federala davart las persunas estras e davart ils fatgs d'asil (art. 4 LitLEA; DG 618.100) avess previs, che la Regenza po obligar las vischnancas da recepir – a norma dal dumber da lur populaziun – [...] persunas cun basegn da protecziun. Cun ses agir ha la Regenza intenziunadamain evità quai, perquai ch'ella na vuleva betg engrevgiar las vischnancas cun incumbensas supplementaras. A medem temp ha questa decisiun chaschunà ina tscherta inegualitad giuridica tranter las persunas dal sector d'asil. In accompagnament ed in'assistenza da persunas che tschertgan protecziun, che surpassa la purschida da l'ulteriura populaziun, n'è per quest motiv betg stà inditgà d'emprim ennà. La Regenza è er da l'avis, che l'alloschament e la convivenza en la medema chasada pon esser ina sfida per persunas che n'enconuschan betg ina l'autra. L'Uffizi da migraziun e da dretg civil ha perquai svelt prendì en funcziun alloschis collectivs supplementars, per ch'il chantun possia alloschar las persunas cun status da protecziun S che vegnan attribuidas ad el. Plinavant han ins supplitgà gia baud l'Agid svizzer als fugitivs, da desister d'intermediar famiglias ospitantas directamain davent dal Center federal d'asil. L'intermediaziun han ils posts chantunals surpiglià sezs. Sche pussaivel han els adina dà adatg, che las localitads na stuevan betg vegnir utilisadas cuminaivlamain cun la famiglia ospitanta.

Tar la dumonda 2: Il chantun tgira las persunas che tschertgan protecziun en moda cumparegliabla a las ulteriuras persunas che basegnan sustegn. Particularmain en il senn da garantir l'egualitad giuridica da las persunas dal sector d'asil na planischa la Regenza perquai betg d'extender las capacitads d'assistenza per las persunas cun status da protecziun S resp. per lur famiglias ospitantas. Actualmain dispona il chantun d'avunda plazzas en alloschis collectivs per persunas cun il status da protecziun S. Sche persunas cun il status da protecziun S na pon betg pli viver tar las famiglias ospitantas, èsi pussaivel da survegnir ina piazza en in alloschi collectiv.

Tar la dumonda 3: En il preventiv 2023 ha la Regenza resguardà las resursas finanzialas ch'èn necessarias en connex cun las persunas cun status da protecziun S, e quai per tut ils posts da servetsch respectivs. Las plazzas da lavur ch'èn limitadas temporarmain pon uschia vegnir prolungadas.



En num da la Regenza

Il president:

Marcus Caduff

Il chancelier:

Daniel Spadin